

REGLAMENTONAN RIBA PAPEL Y REGLAMENTONAN ORAL

Ultimo dos dianan por a scucha continuamente na varios emisora asunto di **REGLAMENTONAN** di concurso di Tumba y di Calypso.

Por a scucha interpretacionnan di **REGLAMENTONAN** existente (y no existente - riba papel). Mi lo referi aki na **REGLAMENTONAN** di tumba, pasobra e aña aki mi no a mira reglamentonnan di Calypso-roadmarch.

A:.....Por a scucha cu Maestro di ceremonia a lesa e reglamentonnan, y cu mester tene bo mes na e reglamentonnan.

Esey ta verdad.

B:.....Por a scucha cu reglamento ta bisa cu no mag presenta cu papel na man durante e concurso y cu tabata tin coro cu papel.

E reglamento **LESA** e anochi ey, no tabata tin **NADA** menciona di esaki.

E "**presunto reglamento oral**" cu lo por ta existi, si esaki a yega di wordo comunica, lo por ta asina, pero skirbi tin nada di esaki den reglamento.

C:..... A wordo papia cu pa tumba no ta permiti sequencer.

Riba papel no tin **NINGUN REGLAMENTO** cu ta menciona esaki.

Si e ta "**presunto reglamento oral entre organizacion y musiconan**" esey mi no sa, pero skirbi no tin nada di esaki den e reglamento **lesa**.

Un banda a presenta den pre-seleccion cu Sequencer, y e no a wordo descalifica.

Pues, si tabata tin e reglamento aki riba papel, e lo a wordo descalifica sigur. Den final si e no a presenta cu Sequencer.

D:..... A wordo menciona cu MESTER A DESCALIFICA e participacion di **Papito** pasobra e banda no a presenta riba escenario den e 6 minuutnan di preparacion.

Aki mi mester menciona cu ta un rato despues cu Maestro di ceremonia a anuncia pa e banda subi, el a haya encargo pa participa na tur manager di banda pa pasa "**tras di stage**".

For di e momento ey **HURADO** mester a wordo poni na altura pa no cumenza conta e 6 minuutnan, pasobra tin algo andando cu mester wordo soluciona.

Si esaki a tuma lugar mi no sa, pero ta algo cu sigur mester a tuma lugar, sino hurado lo no a permiti e banda subi despues di 40 minuut tampoco, manteniendo nan mes na e stipulacion 3 di "**C: Puntonan sumamente importante**" di e reglamento.

Si "**Cassenger Sweet Band**" a subi despues di 40 minuut, - despues cu lo a yega na un solucion - y cu el a participa cu e cantante **Papito**, y a wordo huzga, te cu **Papito** a gana e concurso, kiermeen cu esaki tabata permiti y cu **Papito** a gana participando tur limpi cu ta den e concurso.

Pero..... si tabata tin acuerdonan logra cu no a wordo cumpli y cu Hurado no a wordo poni na altura di esaki, mester busca e error cerca esnan cu no a cumpli cu palabracion y cu a faya den comunica hurado di e "**probable**" palabracion logra.

Si **HURADO** a wordo poni na altura cu tin un paralizacion di e concurso, y paraliza nan trabao sperando desaroyo cu ta tumando lugar, nan no tin nada di culpa den e asunto di conteo di 6 minuut cu a **bira 40**.

Si e banda a subi pa e concurso sigui normal y nada a wordo comunica na e hurado, nan ta huzga e participante manera nan ta huzga tur otro sin pensa mes riba descalificacion pa "**Equis**" motibo.

Aki pues mi no ta mira unda culpa lo mester bay cay riba huradonan.

E:.....Tabata papia di no mag cambia secuencia acorda segun tiramento di lot.

E no ta para riba e papelnan di reglamento di tumba tampoco.

Esaki tambe por ta un "**posible**" palabracion oral, pero cu no a wordo comunica di antemano tampoco na medianan di comunicacion pa nan por ta na altura di esaki pa informa pueblo o e publico.

E no tabata para tampoco den e reglamentonnan cu a wordo lesa e anochi ey riba escenario.

Awor..... Si e tabata un "**reglamento (oral) palabra, kende anto a permiti pa e cambio tuma lugar?**"

Di con papelnan di maestronan di ceremonia tin e cambionan di 3 pa 9 y di 9 pa 3 y e papelnan di hurado no tin e cambio aki manera a wordo expresa den un di e programanan radial?

Aki tin caba un falta di comunicacion di parti di e organizadonan.

Si e no ta permiti, y e organizadonan a permiti pa e sigui toch, sin cu tabata tin kitamento di punto of descalificacion, no ta cerca e organi-

zadonan mester busca e culpa?

Si e bandanan sa cu ta contra (reglamento oral) pa cambia posicion di presentacion, anto e bandanan a actua contra reglamento (palabra como reglamento oral) mester a actua contra tur dos banda.

Si no a haci nada, si no a actua contra bandanan, si no a aplica descalificacion, si no a comunica cu hurado, y e anochi a termina cu e "**bululu**" e fout mester wordo busca cerca esnan cu a permiti pa esaki a yega asina leeuw.

Si despues di tiramento di lot caba tabata tin comentarionan ta circula tur caminda caba, cu e **topico a bira batata cayente caba**, mester a busca na soluciona esaki prome cu a cumenza e concurso y no warda te ora cu e concurso tabata aden caba y cu e "**chispa chiquito a bira vlam te cu el a expande pa un siniestro**".

Mi mes a yega stadion 6.45 or keriendo cu lo cumenza 7 or, y a tende caba cu lo por bin problema debi na cambio di posicion y cu "**Papito**" (aki mi lo bisa: cu e tumba di **Papito**) ta involvi.

Te ainda mi no a tende kende a cambia cu kende y pakico?

Un ta menciona un banda, otro ta menciona otro banda.

Un ta menciona un motibo, otro ta menciona otro motibo.

Un ta bisa di no tabata sa, otro ta bisa di no tabata na altura tampoco.

Otronan cu tabata sa cu a cambia, a expresa nan malcontento, cu lo no tabata tin oido.

Un ta tira culpa riba otro di a permiti e cambio, otro ta bisa di no sa di cambio haci, y cu mester tene bo mes na reglamento, pero.... e asunto a **keda mes confundi te awe**.

Ningun hende te awor a duna un aclaracion **EXACTO** di henter e desaroyo y pakico e asunto a bay for di man.

Scuchando tur e comentarionan y criticanan, mi ta puntra: pakico esun of esunnan cu a causa esaki no ta acepta cu nan a comete un error y bin dilanti y acepta esaki.

Pakico mester a yega asina leeuw cu a crea **desconfianza** gigantesco entre musiconan y organizacion **ASOMA**?

Pakico esnan cu lo no a papia berdad, no ta admiti cu nan lo ta equivocada den nan expresion?

F:..... Tambe a wordo comenta asunto di huradonan.

Pakico ta acerca un persona pa busca huradonan, y tras di su lomba ta busca otro huradonan y pa despues no acepta huradonan di e prome?

Si ta for di e organizadonan e encargo a sali, di con e organizadonan no ta sali afo anto admiti cu e error aki a tuma lugar y disculpa nan mes na e persona y e huradonan busca riba encargo for di nan propio seno?

G:..... Henter e desaroyo aki a trece cune un division grandi den mundo musical di nos isla.

Ta mahos pa tende un colega musico ta papia contra otro colega musico publicamente; cu un **colega musico** ta critica otro colega musico; cu **musiconan** cu a fungi como hurado ta wordo critica, e **mes musiconan** cu mester busca manan atrobe como hurado; cu ta **tende di nivel esaki**, nivel esaya, **conocimento esaki** of **conocimento esaya**;

cu **mes erronan** di pasado ta bin dilanti atrobe como excusa pa erronan cometi.

H:.....Nos a tende di musiconan cu a bisa "**amen, ami a caba cu e actividad aki!**" Nos por a lesa di Eddy Ras cu a bisa "**Ayo**" despues di añanan largo ta toca pa cinco te 10 agrupacion riba un anochi, y den mayoria di caso, nunca a ricibi un cent pa esaki. Aña pasa caba su bushi a yena, sinembargo el a dicidi di sigui cu locual e ta stima, esta musica y acompaña cantantenan. Awor si publicamente el a despedi di **ASOMA**.

A yega asina leeuw cu e division a causa cu **ASOMA** a reuni ayera y tambe un grupo di musico a reuni na otro lugar ayera y tur esaki pa motibo di erronan cu a tuma lugar cu ningun momento mester a tuma lugar.

Kico a pasa diasabra anochi, y pakico esaki a pasa, casi sigur lo nunca wordo aclarea si esnan cu sa di dje y cu a causa cu el a yega asina leeuw no bin dilanti y splica tur cos pero "**cu e verdad y nada mas cu e verdad**".


— Juby —

BUY WISE

Department Store - Bubali Commercial Center

9:00am-12:30pm / 2:30pm-6:30pm

**Nos tin luz di bateria pa
lightning parade**



TELEFONNAN DI DIARIO

826747

FAX

828551



Clinica pa Medicina Asiatico

TERAPIA, HOMEOPATIA Y ACUPUNTURA

- **Allergia**
- **Stress**
- **Dolor Muscular**
- **Asma**
- **Nerviosismo**
- **Impotencia**
- **Baha Peso**
- **Massage Chines**
- **Meno Pausa**
- **Migrane ek.**

Tur tipo di tratamento

VEGATEST cu ta dunabo hopi informacion di bo salud

Pa un cita yama na Tel: 889155

9:00 AM - 5:00 PM Havenstr. 30 2nd Floor di Botica Kibrahacha